



Niuspepa bilong ol Papua Niugini stret

Wantok 12t

Ol Photo

Kembris Kap

p.10

Hara Kap

p.18



Straika Perrie Quaze holim Hara Kap. Em i givim pes gol long Guria taim Yuni i winim Guria 2-0 long fainols. Stori long pes 18.



Mosbi Bratas holim Kambris Kap. Ol i karim i kam long Mosbi na soim long ol pipel long Sande, 13 Epril. Stori i stap long pes 10.

Mas Stretim Wari

Ol wokman long PNG i gat olkain liklik wari bilong ol. Nau ol bos bilong ol yet i mas sindaun wantaim ol na traim stretim ol dispela wari. Leba na Employmen Minista, Mista Jacob Lemeki i bin tokaut long dispela nupela pasin long wik i go pinis.

Bipo Gavman i save sindaun wantaim ol mausman bilong ol wokman na ol bos yet bilong stretim ol wari bilong ol wokman. Gavman i save kam long harim ol wari, taim ol wokman i stopwok. Sapos ol liklik wari i kamap, ol bos yet i save stretim.

Tasol Mista Lemeki i tok, sampela taim Gavman i save kam long stopim ol trabel na mekim ol samting i rong olgeta. Olsem na nau Gavman i no inap kam bilong helpim ol. Sapos stopwok i bagarapim planti pipel bilong PNG, em bai Gavman i kam bilong helpim ol.

Na tu Gavman i wokim sampela lo bilong pe, ol wok-

man i save kisim. Wanpela komiti ol i kolim, Minimum Wejes Bot, i save lukautim kain pe ol wokman i mas kisim. Dispela komiti i go raun long planti provins tru bipo em i kamapim ol lo bilong pe. Em i toktok wantaim planti wokman na ol bos tu.

Em hia ol nupela lo bilong kain pe ol wokman bilong ol kampani i mas kisim. Pe bilong wokman insait long taun i narakain long wokman long viles yet.

1. Pe bai i go antap, sapos prais bilong ol samting long stua i go antap. Lo bilong Gavman ol i kolim, Konsuma Prais Indeks, bai tokaut long hamas moa mani ol wokman i ken kisim. Dispela lo bai lukim prais bilong ol samting olsem, sop na rais na tin mit na tin pis, na sol na suga, na trausis na ol klos. Sapos prais bilong ol i go antap, orait lo ya bai makim hamas mani ol wokman bai kisim antap long pe bilong ol.

I go moa long pes 2.

Smatpela man i save baim sea long Invesmen Koporesen

Sapos yu laik save moa rait i kam long

Investment Corporation of Papua New Guinea

P. O. Box 155, Port Moresby.





WINMANI

Las wik Maun Hagen Lokal Gavman Kaunsil i muvim wanpela mosin long pasim dispela pilai laki ol i kolim Winmani. Ol i laik pinisim dispela pilai insait long Hagen Taun. Ol i tok, planti mani i lus nating. Ol i tok dispela kain pilai i no inap kirapim kantri bilong yumi.

Tasol provinsal gavman bilong ol i tok dispela pilai laki em i wanpela gutpela samting. Ol i tok dispela pilai laki i kamapim moa mani bilong helpim wok gavman. Olsem pilai laki bai stap.

Mipela hia long Wantok Niuspepa i tok egens long dispela pilai long taim ol i kirapim. Mipela tok, dispela pilai bai kamapim planti hevi insait long kantri. Tasol toktok i no inap karim kaikai. I mas i gat planti lokal gavman kaunsil olsem kaunsil long Hagen i tokaut egens long dispela pilai. Sapos i gat planti kaunsil i tok egens long pilai orait, provinsal gavman i mas pinisim dispela pilai. Em i laik bilong ol pipel tasol.



Ben Kanombo bilong Ialibu long Sauten Hailans i amamas sanap wantaim Miss Jane Kanjikanji bilong Tufi insait long Noten Provins. Tupela i amamas long wanem tupela i winim wanpela prais. Ol i makim tupela i kamap olsem namba wan hostes bilong Air Niugini long yia 1980. Tupelai winim ol arapela wanwok long wok long lukautim ol man insait long ol balus. Ol i winim dispela prais long Epril 2 insait long wanpela seremoni we 19 hostes i pinisim skul bilong ol na i redi long flai.

Helpim Fiji

Papua Niugini bai salim K50,000 (fifti tausen kina) i go long Gavman na pipel bilong Fiji.

Dispela mani bai i helpim Gavman bilong Fiji long oraitim ol bagarap tupela bikpela raunwin i bin mekim long Fiji.

Praim Minista Sir Julius Chan i bin tok olsem Nesenal Eksekutiv Kaunsil i bin tok orait long salim dispela mani i go long Fiji.

Tupela bikpela raunwin long Fiji i bin mekim ol graun bilong maunten i pundaun na bikpela tait i kamap long olgeta nambis bilong Fiji.

Dispela bikpela bagarap i kilim 16 man na meri na planti tausen moa pipel i stap hangre na ol i no gat haus bilong ol. Sir Julius Chan i tok ol-

sem em i bin tokim Dipatmen bilong Foren Afeas (husat i bosim ol wok na tok wantaim ol arapela kantri) na Dipatmen bilong Fainens long hariap long salim dispela mani i go long Fiji.

Na tu, Sir Julius Chan i bin tok olsem Gavman bilong Papua Niugini i salim tok sori i go long Gavman na ol famili bilong ol man na meri husat i dai long dispela bikpela bagarap insait long Fiji.

Mas Stretim Wari

I kam long pes 1.

2. Pinis bilong olgeta 6-pela mun ol bos i mas sekim prais bilong ol samting long stua. Sapos prais bilong ol dispela samting i go antap olsem 80t, orait kampani i mas putim 80t antap long pe bilong ol wokman.

3. Sapos ol prais i lusim mak bilong 80t, orait kampani i mas peim 80t na sampela toea gen antap. Dispela lo Minimum Wejes Bot yet i kamapim.

ol nupela lo ya i gutpela. Em i ting, dispela ol lo inap stretim olkain, belpen namel long ol wokman na bos bilong ol.

Tasol sampela man i go pas long ol union grup i no bin klia long ol dispela lo. Olsem na long Epril 11, ol i kibung wantaim Mista Lemeki. Ol i laikim Mista Lemeki long tokaut klia long ol dispela lo long ol.

Mista Lemeki tu, em i no man nating. Bipo taim em i no memba bilong Palamen, em i wok long wanpela bikpela union grup tru long PNG. Dispela grup, em i Pablik Sevis Asosiesen.



Jacob Lemeki

Siaman bilong dispela komiti, Mista Aphmeledy Joel i tok,

● Franzalbert Joku

NIUS-NIUS-NIUS

☆RAIS I SOT – Rais bai sot yet inap long sampela mun long olgeta hap bilong PNG. Wanpela tokman bilong Rais Indastris long Lae i tok, planti stua bai i no inap kisim inap rais long salim long ol pipel inap long taim olgeta bakstua i gat inap rais. Em i tok, rais i wok long kam yet long Australia.

☆FIJI NO KEN KAM – Wanpela kantri insait long Saut Pasifik ol i save kolim Fiji i no inap kam long Saut Pasifik Ats Festival long Pot Mosbi long mun Jun. As bilong dispela i olsem tupela bikpela raunwin i bagarapim dispela kantri na Gavman bilong Fiji i no gat planti mani long salim sampela lain i kam long festival.

☆MOA MOA KA – Long yia 1978 namba bilong ka ol pipel i rejistaim i bin go antap moa yet. Long mun Desemba 1978 i gat 44,318 ka ol pipel i rejistaim. Dispela namba i winim tru namba bilong ka i bin kisim rejistresen long 1977, 1976 na 1975. Long yia 1977 ol pipel i bin rejistaim 43,763 ka tasol na long yia 1976 i gat 42,575 ka i kisim rejistresen. Long 1975, ol pipel i rejistaim 41,430 ka tasol.

☆LUSIM PAPUA BESENA – Memba bilong Midel Flai, Misis Waliyato Clowes, i lusim pinis Papua Besena. Em i tok, Papua Besena em i samting bilong Sentral Provins tasol. Na em i tok, Papua Besena i no save tingting long ol arapela provins bilong Papua.

☆LUKIM INDEPENDENS DE – Zimbabwe i kisim independens pinis. Ol i kisim long biknait long Epril 17. Tripela man bilong Papua Niugini i go lukim dispela de bilong amamas. Em Mista Fred Reiher, pesman bilong Papua Niugini i stap long Englan na Yurop. Memba bilong Kainantu, Mista Ubiti Yulaki, na Mista Wilson Ephraim bilong Dipatmen bilong Foren Afeas, i go wantaim em. Namba wan pikinini bilong Kwin Elizabeth, Prins Charles, i bin kamap na lukim independens long Zimbabwe. Em wanpela kantri bilong Afrika we bikpela pait i kamap bipo.

☆WINIM PRAIS – Wanpela man bilong Amerikan Samoa em i winim K250 long pes prais insait long wanpela resis bilong raitim stori. Saut Pasifik Ats Festival Komiti ol i bin wokim dispela resis. Nem bilong dispela man em i Mista Joseph Theroux.

☆HMAS BRISBANE – Woa sip bilong Australia, HMAS Brisbane i lukluk raun pinis long Rabaul na Lae. Ol pipel bilong Rabaul i lukim pinis dispela Woa sip stat long Epril 11 i go inap 12 Epril. Ol pipel long Lae i lukim sip long Epril 14 i go inap 16. Hevi bilong dispela woa sip em 4,570 tan. Samting olsem 300 sela i stap long sip. Dispela woa sip i gat gan, bom na arapela samting bilong pait antap long sip.

WANTOK NIUSPEPA

Nius i kamap 52 taim long yia nau.

Opis bilong Edita na Edvetaising long P.N. G. P.O. Box 1982, Boroko
Telipon: 25.2500 Teleks: NE 22213

Edvetaising long Australia
Central Media Sales, Sydney
Telipon: 436.1000 Teleks: AA23211

PE BILONG WANPELA YIA, 52 NIUSPEPA

Ples	Kam long balus	Long sip
Mosbi	K 10.00	K 10.00
P.N.G.	K 14.00	K 14.00
Australia	A\$ 36.00	A\$ 29.00
N.Z., Fiji		
Pasifik Ailan	NZ\$47.50	NZ\$ 32.00
USA, Yurop	US\$ 70.00	US\$ 47.00
	DM 120.00	DM 81.00
	L 31.00	L 21.00

TAMBU TORO



Go Long Holan

Nating yumi olgeta i save long Blak Bratas, wanpela ben bilong Wes Irian. Ating yumi olgeta harim nek bilong ol pinis. Sampela i lukim ol na harim ol taim ol i raun nabaut long PNG. Na tu planti arapela i harim ol long keset. Long las yia, ol i kam raun long PNG. Na nau ol i stap long Holan, wanpela kantri long Yurop.

Tasol sampela ri-pot i kam long Holan na Indonesia i tok, dispela grup i wok long askim gavman bilong Holan long tok orait long ol i ken stap long Holan. I gat 22 pipel olgeta long dispela grup. Em long ol memba bilong ben, na meri pikinini bilong ol. Ben menesa, Mista Andy Ayamiseba i go pas long grup.

Ol i askim gavman bilong Holan long larim ol i stap olgeta long Holan. Ol i tro-moi wari bilong ol i go long han bilong gavman bihain tasol

long taim ol i go kam-ap long Amsterdam, biksiti bilong Holan. Ol i lusim Pot Mosbi na i go long Holan long Januери bilong dispela yia tasol.

Mista Ayamiseba i tok, em i tru olsem, ol i laik stap olgeta long Holan. Em i tok-aut long dispela long telipon long las wik. Em i tok, ol i wet tasol long bekim bilong gavman.

Em i tok, ol i no tingting long kam bek long Wes Irian. Em i tok olsem, sapos gavman bilong Holan i tok orait long ol i

stap, em bai gutpela tru. Ol bai stap na kamapim kain musik na pasin sindaun bilong Wes Papua long Holan na ol arapela kantri.

Blak Bratas i bin stap long Jakata, bik-taun bilong Indonesia. Long 1976, ol i stap long Jayapura, provin-sal hetkota bilong Wes Irian. Ol i lusim Jayapura na i go long Jakata. Taim ol i stap long Jakata, musik bilong ol i tanim lewa bilong planti pipel tru. Orait bihain tasol long wan mun planti pipel i baim namba wan keset singsing bilong ol. Moa long 1



Ol Blak Bratas taim ol i stap long Mosbi long 1979.

milien olgeta i go aut olsem na ol i winim "golden rekot" long salim planti keset tru.

Ol i no stap tasol long Jakata. Nogat. Ol i raun nabaut long ol kantri bilong Esia. Na ol kain nek bilong Wes Irian tu i katim lewa bilong planti pipel bilong Asia. Las yia, Mista Eddy Kwan

i askim Dipatmen bilong Foren Afeas bilong PNG long orait long Blak Bratas i kam long PNG na singsing raun. Ol i kam long Oktoba 2, las yia. Na 28 Januери long 1980 tasol, ol i lusim PNG.

Tasol gavman i luk-luk long askim bilong ol na i tok nogat. Long wanem gavman i save,

olsem Blak Bratas i wok klostu wantaim indendens muv-men OPM. Gavman bilong PNG i bilip olsem, dispela grup i no singsing na apim pasin tumbuna bilong Wes Irian tasol. Nogat. Ol i gat as bilong mekim ol singsing ya. Ol i wok long skrap-im wok politik tu.

Taim PNG gavman

i tok nogat long askim bilong ol, Mista Ayamiseba i sut stret long Holan. Em i go askim gavman bilong Holan long sapos Blak Bratas grup inap go long Holan. Em i kam bek long Januери 24. Na 4-pela de bihain em na grup bilong em i sut i go stret long Holan.

● Franzalbert Joku

N K i u s



Kirap long lephan (baksait yu ken lukim Ahmad Bin Maarof (NBC Malaysia), Thomas Kathoa (NBC Madang), Roheo Tangaroa (Kuk Ailan), Jae Deo Prasad (Radio Fiji), Raka Saini (namba tu Siaman NBC, PNG), Winnie Moka (NBC, Boroko), Cecilia Sangul (NBC, Boroko), Bruce Broadhead (Stiaman) na Fuwito Yosodjporo (Indonesia).



Engesim Sot Sket

Yu ting yu putim sotpela dres na yu katim lewa bilong olgeta man bilong PNG? Ating nogat tru ya.

Yu no ken tingim dres bilong ol waitskin man tasol. Dispela dres i no kam long tumbuna bilong yumi long PNG. Mi ting yumi mas askim ol man bilong ples bilong yumi pastaim. Yumi mas askim ol long hau ol tumbuna bilong yumi i save werim gras sket. Ol i save werim sotpela gras sket o ol i save werim longpela gras sket.

I nogut long yumi amamas long putim sot sket bilong Aus-

tralia tasol. Na bai i no luk gutpela tumas long ai bilong ol wait man.

Na tu dispela samting i no olsem sotpela gras sket bilong ol tumbuna bilong yumi-tupela. Ating susa, yu no tingting gut pas-taim long yu raitim dispela pas bilong yu. Independens i no min olsem yu ken putim sot sket long laik bilong yu tasol.

Husat man o meri i laik sapotim tingting bilong mi, rait tasol i kam long Wantok Niuspepa. Em tasol. Tenkyu.

Martin Kapasngay. Ambunti, ISP.

Dia Edita — Plis givim liklik spes long mi na bai mi bekim pas bilong susa ya, Susan Matalik bilong Maun Hagen, W.H.P. Mi lukim long Sarere 20 de bilong mun Januери.

Yes susa, yu bin tok olsem PNG i kisim Selp Gavman na Independens. Olsem na marit meri na singel meri i ken putim sotpela sket o dres. Ating yu wanpela bilong ol dispela meri i save putim dispela kain dres.

Karim Pasindia Nating

Dia Edita — Inap yu givim mi liklik spes na mi putim wari bilong mi. Wari bilong mi i go olsem:

Mi lukim planti teksi hia long Pot Mosbi i no gat mita bilong ol. Taim ol kisim pasindia i go long wanpela hap, mak bilong K2 ol save sasim ol long

K4. Na K2 em bilong ol baim kaikai bilong ol. Na taim ol painim wanpela man o meri i gat bia o pasindia meri ol save kisim ol raun nating nating.

Em i no stret long mipela sampela man save baim na sampela i save raun nating. Kampani i no tok bai yupela karim man nating o raun long spak na pamuk. Na tu kampani i no tok bai yupela mekim hap mani bilong yupela. Nogat tru. Kampani i mas mekim wok nau long stretim mita bilong olgeta taxi bilong

ol. Em tasol na yu husat man o taxi draiva laik bekim orait rait tasol i kam long Wantok Niuspepa na mi ken lukim. Tenkyu.

Taitas Kila, Chuave, Simbu Provins.



Dia Edita — Mi laik bai yupela i raitim dispela wari bilong mi i go long Wantok Niuspepa. Na wari bilong mi i go olsem.

Mi ting nupela Gavman i mekim pasin nogut. Em hia olgeta toktok bilong mi.

Nupela Gavman i no longpela taim. Em

aste tasol, em i kisim pawa. Na em i no statim wok tru bilong em yet. Tasol stat wok bilong em long skelim wok minista i rong pinis.

Em i no mekim wanpela wok yet tasol stat wok longskelim wok minista i nogut pinis. Olsem na ol pipel i wari. Nogut

Kot Stilim Mani

Dia Edita — Plis inap yu lusim hap spes long mi na mi helpim brata ya, Kopata Moses bilong Panguna, NSP.

Long lukluk bilong mi i wankain long yu long pasin ol plisman na ol kiap i mekim.

Yes, taim wanpela man, em i stilim samting bilong arapela man, olsem mani, klos, trausis, o brukim suga long gaden o ol i kilim pika kaikaim. Sapos wanpela man i stil na papa bilong ol dispela samting i lukim na kotim em, ol plisman i karim em i go long rumkat na ol i sasim em K100 o K50 o K30.

Dispela man, em i ken belaut na bihain i kam bek long kot. Taim plisman o kiap i sasim dispela man i

stil long baim kot o rumkat, dispela mani save go long beng bilong Gavman. Na tarangu papa bilong ol samting i lus ya i no kisim wanpela mani. Na hatwok bilong em bai lus nating. Mi ting, dispela kain pasin i no stret tumas.

Tru sapos man i brukim bikpela lo olsem kilim man o brukim bikpela stua o ka kilim man o man i bagarapim sindaun bilong tupela marit o kain pasin olsem. Orait, em ol dispela kain trabel, em Gavman i ken kisim mani.

Na i no gutpela long kisim mani nating long ol samting bilong ol man i lus.

Andrew V. Kaijin Kundiawa, Simbu Provins.

yumi bai bagarap klostu taim o bihain taim.

Dispela pasin nogut mi tok long en ya i olsem. Bipo tru taim ol waitman i lukautim yumi, dispela taim ol i save kolim yumi olsem Papua, em i Papua. Na Niugini, em i Niugini. Ol i save brukim yumi long tupela hap. Na yumi i save gat tupela nem.

Orait, bihain yumi kisim Selp Gavman na Independens. Dispela taim Mista Michael Somare i kamap lida bilong kantri. Tarangu. Dispela taim em i trai hat tru long bungim dispela tupela hap, Papua na Niugini long kamap wanpela tasol. Na i mas i gat wanpela nem tasol i stap long yumi.

Tasol ol Papua i no lusim tingting yet. Ol i laik bruk lusim Niugini. Ol i laik kisim gavman bilong ol yet. Tasol Mista Somare i no laikim dispela tingting. Na em i no bin harim toktok bilong ol. Mista Somare i strong i go i go na nau yumi stap olsem wan kantri.

Tasol sampela wik i go pinis, nupela Gavman i kisim pawa. Tasol dispela, em i no long strong bilong ol

lida bilong Papua tasol. Na tu em i no long strong bilong ol lida bilong Niugini tasol. Nogat. Ol Papua na ol Niugini i bung wantaim na pasim tok wantaim na autim olpela Gavman wantaim.

Tasol taim ol i skelim wok minista, ol i no laik skelim gut i go long ol man Papua na ol man Niugini wantaim. Olgeta wok minista i gat nem. Na i luk olsem olgeta bikpela wok minista, em ol lida bilong Niugini i kisim. Ol bikpela wok i gat nem, em ol kain wok olsem, namba tu Praim Minista, wok Fainens, wok Disent-ralaisesen, wok Jastis, wok Haia Edukesen na wok DPI.

Na mipela ol pipel i lukim olsem i no stret. Tasol bai mipela mekim wanem nau? Em i tulet pinis.

Em tasol liklik wari bilong mi na ol pipel. Husat wantok o pren i gat kros o i laik sapotim tok bilong mi, orait, rait tasol long Wantok Nius. Tenkyu.

Timmy Bunas, Wabag, Enga Provins.

Salim ol pas i kam long: WANTOK BOX 1982 BOROKO

Wantok Sistem Plisman

Dia Edita — Mi laik bai yupela givim liklik spes long mi bai mi putim wari bilong mi. Wari bilong mi i go olsem.

Mi save lukim ol plisman long Maprik i save wokim wantok sistem. Dispela pasin, em ol hailans plisman husat i stap long Maprik i save wokim.

Sapos wantok bilong ol i mekim trabel, ol bai isi tasol long sasim ol na putim ol long rumkat. Na sapos ol arapela man i mekim trabel, bai ol i no isi. Bai ol i paitim em nogut tru na bihain bai ol i sasim em na putim em long rumkat.

Mi lukim ol plisman i mekim dispela kain pasin planti taim na mi no amamas tumas.

Olsem na mi rait i kam long Wantok Niuspepa. Bai ol plisman long Maprik i lukim. Na bai ol i ken ting long wanem samting ol i save mekim.

Na mi laik tok olsem, yu husat plisman i belhat tru, em wari bilong yu. Kisim pen na rait i go long Wantok na bekim pas bilong mi, olsem bai mi ken lukim.

Raphael Ningido Maprik, Is Sepik Provins



MIPELA SAVE MEKIM OLKAIN WOK BILONG BENG


- ☆ Pas Buk
- ☆ Sek Buk
- ☆ Man i ken putim mani long beng na winim profit mani
- ☆ Sapos yu kisim narakain mani bilong wanpela arapela kantri, beng i ken senisim i kamap kina na toea.
- ☆ Ben i ken stretim olgeta tiket bilong yu, sapos yu laik go lukluk raun long arapela kantri.

Bank of New South Wales (PNG) Ltd.

Mipela amamas tru long helpim yu



Sapos yu ring na yu laik toktok wantaim wanpela arapela kantri olsem Australia o Yurop o Amerika o Hongkong — orait, yu mas ringim namba 016 na bai yu bungim wanpela man o meri i sindaun long dispela bikpela tebol. Ol manmeri hia i ring i go long ol arapela kantri. Ol i wok long san na long biknait tu. . . . maski, yu laik ring long wanem taim.



Baim Olpela Mani

WANPELA BIKPELA BISNIS BILONG BAIM KOIN MANI

Mipela i laik baim ol silva koin mani bilong Australia bilong bipo yet i kam inap long 1966. Na tu mipela i laik baim Niugini silings na ol 50 sens Australia mani no gat kona long en ol i wokim long yia 1966.

Mipela bai baim olsem:-


- K1 long ol florin (tu siling).
- 50 toea long ol siling (wan siling) Australian.
- K1 long Niugini siling.

Mipela bai stap long ol dispela ples hia stat long 10 klok moning i go inap long 6 klok apinun.

KIETA	Kieta L.G. Kaunsil Samba	Epril de 18	956175
PANGUA		Epril de 19	
BUIN	Buin Komyuniti Senta	Epril de 21	
ALOTAU	Provinsal Gavman Esembli Hol	Epril de 24	
POT MOSBI	Davara Hotel, Rum 9.	Epril de 26	212100

SOUTHERN CROSS COIN CENTRE
G.P.O. Box 1200, Brisbane 4001. AUSTRALIA.

Masin hia i luk olsem wanpela teprikoda. Sapos yu ring i go long Australia, bai wanpela tok i kamap, na nek bilong wanpela man i tok olsem: "Nau mipela i wok long bungim yu wantaim Australia" Orait, dispela tok i stap long dispela tep tasol na em yet i mekim dispela tok. Sampela taim dispela kain tok i kamap: "Sori, mipela i no inap bungim Australia nau. Yu wet liklik na bihain liklik yu ring gen"



Sapos yu laik ring na yu litimapim telipon na i gat wanpela krai insait long em i tok, ol i toktok nau long telipon yu laik ringim. Dispela tupela masin hia i mekim dispela kain nois long telipon. Em i tok telipon i bisi.

Ol Wok Telepon

Sapos yu stap long longwe ples olsem Vanimo o Buin o Manus na yu laik ring i go long Mosbi, bai wanem samting i kamap? Pastaim toktok bilong yu i go long wanpela liklik waia. Dispela waia i go long telipon opis long taun ya. Orait, nau tok i go long wanpela bikpela dis plet i stap antap long telipon opis. Dispela plet o dis i sutim tok i go long narapela dis, na i go i go inap em i kamap long Lae. Lae em i hetkota na hetopis bilong wok telipon. Nau ol bikpela masin bilong Lae gen i salim tok i go nabaut long kantri.

Mi mekim wanpela tok piksa nau. Em i olsem sapos yu sindaun i stap na wanpela natnat i kaikai fut bilong yu. Fut i pen na em i salim wailes o telipon i go long het bilong yu. Nau het o kru bilong yu i salim tok save i go long han bilong yu. Han i mas paitim natnat. Na em i mekim olsem. Het na kru bilong yu i olsem hetkota bilong ol dispela kain wailes o telipon insait long bodi bilong yu. Lae em i dispela hetkota bilong wok telipon long PNG.

Tasol ol dispela samting i no isi. Long planti kantri bilong graun i gat planti planti waia moa, na ol toktok i ran long ol waia tasol. Na sapos i olsem long PNG, bai i gat waia i go inap long Wabag na Vanimo na Buin na Rabaul na Mosbi. Na em i mas go aninit long solwara tu. Tasol nau ol saveman i no yusim waia moa. ol i sutim samting olsem lait yu no ken lukim. Na dispela i karim

tok long wanpela plet o dis i go long narapela. Wanpela plet inap long karim 960 toktok wantaim.

Tasol i gat wanpela wari. Kain lait na toktok olsem em i no laik flai antap long solwara. Bai em i paul. Olsem na ol i gat narapela kain bikpela plet bilong dispela wok. Dispela plet i sutim tok i go long skai, na narapela plet gen i pulim i kam daun bek.

Bilong toktok wantaim Australia o sampela arapela kantri, i gat wanpela bikpela waia i stat long Madang na i go aninit long solwara. Na em i kam inap long Australia o inap long Ailan Guam na i bung wantaim Amerika.

Planti planti kantri long Yurop i no gat wok telipon inap long dispela yumi gat long PNG. Sampela dispela bikpela plet i sanap antap long ol maunten i gat bateri i save wokim lektrik pawa long lait bilong san. Ol dis na plet i stap antap



long ol maunten bai ol i ken salim tok i go longwe moa. I olsem man i sanap long maunten o ples antap, bai em i ken singaut na toktok bilong em i ken go longwe moa.

Orait, nau yumi laik lukim sampela masin i stap insait long bikpela hetkota long Lae. Dispela hetkota i antap moa. I gat 6-pela plua bilong em. Na i gat wan wan windo tasol. Na insait em i gat planti tausien kain liklik waia. Sapos yu lukim ol, bai yu longlong olgeta. Tasol olgeta wan wan liklik waia i gat wok bilong em na i gat telipon long wanpela hap bilong kantri i hangamap long en.

Frank Mihalic

MOOA

LONG MONI BILONG YU

Nupela!



TRAKA I WOKIM GUT OLGETA SAMTING

Wantaim 1166cc ensin,
Traka i gut tru long draivim
na em i gat strong long go antap
long ol maunten na long rot i nogat kolta.
Yu inap foldim ol sit sapos yu laik karim
kago long baksait.
Gutpela Toyota mechanical parts i givim gutpela wok.
Tasol bai yu mas kisim spares tu
sapos yu laikim.
TRAKA i wok tupela wei na i gutpela transport
bilong ologeta wantaim prais ino dia tumas.
Go lukim ol – Draivim ol nau long ELA MOTORS.



ELA MOTORS

A Member of Burns Philp Group



**TOYOTA
TRAKA**

GS305

YU ASK LONG EN. YU KEN KISIM

TOYOTA

P.S.A. SEVING NA LON SOSAITI

Las wik, P.S.A. Seving na Lon Sosaiti i opim namba wan han opis bilong em long Lae. Interim Primia bilong Morobe, Mista Pama Anio i bin opim dispela hanopis. P.S.A. Seving na Lon Sosaiti i stap tasol long Mosbi. Tasol nau em i namba wan taim bilong em long opim wampela han opis bilong em. Nau tu em i namba wan taim bilong ol pipel i lukim opis bilong em i stap long arapela hap bilong PNG. Ol i laik bihainim pasin bilong skelim ol wok i stap long ol bikpela taun, i go long ol arapela liklik taun.

Dispela opis long Lae bai mekim wok long helpim ol pablik sevans bilong nambis Niugini. Na ol bai opim wampela opis gen long Hagen. Em bai lukautim ol pablik sevans insait long 5-pela hailans provins. Arapela opis tu bai stap long Rabaul na mekim wok lukaut bilong ol wokman bilong ailan Niugini.



INDEPENDEN GAVMAN BILONG PAPUA NIUGINI

Provinsal Gavman spesel lo bilong 1980 bilong bosim ileksen bilong Not Solomons Provinsal Gavman.

WOK BILONG MAKIM OL OPISA BILONG LUKAUTIM ILEKSEN.

KOMISIN BILONG BOSIM OL ILEKSEN, long strong bilong pawa em i kisim long Provinsal Gavman spesel lo na long olgeta arapela pawa em i laik:-

1. tekewe nem bilong olgeta opisa, em i makim bipo bilong lukautim ileksen bilong olgeta ilektoret bilong Not Solomons.
2. Na nau em i laik makim:
 - (a) MOKA HAVARA long lukautim ileksen bilong makim primia bilong Not Solomons Provinsal Ilektoret.
 - (b) na olgeta man (nem bilong ol i stap long Kolum 1) long lukautim ileksen bilong wanem ilektoret i stap long Kolum 2, arere long nem bilong ol.

Kolum 1 Nem

Moka Havara
Moka Havara
Moka Havara
Moka Havara
Moka Havara
Moka Havara

John Kasinga
John Kasinga
John Kasinga
John Kasinga
John Kasinga
John Kasinga

Stewart Priestly
Stewart Priestly
Stewart Priestly
Stewart Priestly
Stewart Priestly
Stewart Priestly

Kolum 2 Ilektoret:

Arawa
Kieta Panguna
Ioro-Eivo
Korimira-Kongara
Nasioi-Pirung
Rotokas

Bagana
Basina
Pongo
Porobere
Rerebere
Rino

Buka Passaga
Punen
Haku-Halia
Islands
Kunua
Teop

Mi raitim dispela long namba 3 de bilong mun Epril, 1980.

N.G. McNAMARA,
Namba tu komisina bilong bosim ol ileksen.



Ol meri sindaun paitim toktok long we ol meri i ken kirapim wok bisnis. Ol i bung Lae long mun i go pinis.



Sindaun (L-R) Emma Landry, Rosemary Ruma, Anastasia Malatana, Mary Tengdwi. Sanap Lephan: Theresa Avila, Dulcie Kekedo, Anna Nepa, Ara Hungrabos, Susan Malir, Angela Manumanua. Namba 3 lain: Elizabeth Robertson, Gunnell Berquits, Helen Unsworth.



INDEPENDEN GAVMAN BILONG PAPUA NIUGINI

Provinsal Gavman spesel lo bilong 1979 bilong bosim ileksen bilong Westen Hailans Provinsal Gavman.

WOK BILONG TEKEWE OPISA BILONG BOSIM ILEKSEN NA MAKIM NUPELA.

KOMISIN BILONG BOSIM OL ILEKSEN, long strong bilong pawa em i kisim long Provinsal Gavman spesel lo na long strong bilong olgeta arapela pawa, em i laik tekewe tok save bilong opisa bilong bosim ileksen. Dispela tok save em i bin raitim long namba 5 de bilong Mas 1980. Na em i bin kamap long Nesenal Gaset namba G 25 bilong 13 Mas 1980.

Na nau em i laik makim ol dispela man husat inap lukim nem bilong ol long Kolum wan long lukautim ileksen bilong ol ples mipela i putim arere long nem bilong ol man ya long Kolum tu.

Nem.	Ilektoret.
Mugagor Mulul	Hagen
Mugagor Mulul	Wes Kambia
Mugagor Mulul	Lowa Nebilyer
Robin Bubun	Angalimp
Robin Bubun	Hagen Tauns
Robin Bubun	Kui
Peter Pabene	Lumusa
Peter Pabene	Simu - Sip
Peter Pabene	Ugini - Mapoa
Kaping Isong	Bukapena
Kaping Isong	Minjigina
Kaping Isong	Nengil
Dagu Bole	Gumants
Dagu Bole	Kinjibi
Dagu Bole	Kotna - Tigi
Martin Aigal	Lowa Kaugel
Martin Aigal	Apa Kaugel
Martin Aigal	Apa Nebilyer
Papag Guasi	Lowa Jimi
Papag Guasi	Middle Jimi
Simon Naiyer	Kol.

Mi raitim dispela tok save long 27 de bilong Mas, 1980.

N.G. McNAMARA,
Namba tu komisina bilong bosim ol ileksen.

Meri Wok Bisnis

PNG em i wanpela kantri i save apim nem bilong ol man tasol. Na tarangu ol meri, nem bilong ol i save stap aninit long ol man. Olsem na ol meri i save painim hat tru long mekim wok bisnis.

Tasol i gat wanpela miting i bin kamap long Lae, long mun i go pinis. Miting ya i bilong ol meri i wok olsem Bisnis Dvelopmen Opisa. Ol i paitim tok long painimaut we bilong apim nem na pasin sindaun bilong ol meri insait long PNG.

Ol i laik mekim bilong ol meri i mas namba 7 tok bilong 8 wok klostu wantaim Poin Plen i karim kai-ol man long kirapim kai. Em dispela tok kantri.

Insait long dispela miting, 12-pela meri bilong ol provins nabaut i kam bilong kisim skul na tu long givim sampela tingting na save i go long ol arapela meri.



Ol dispela bisnis opisa i tok, ol kos bilong kirapim bisnis i mas kamap long ol viles, Ol dispela kos i mas i gat skul long rit na namba. Ol i tok tu olsem, bai i gutpela sapos ol skul livas asosiesen, na ol yut grup na ol vokesenal senta, i salim ol sumatin bilong ol long ol dispela kos. Em i bilong givim moa save bilong pasin bilong bisnis i go long ol yangpela pipel.

Ol bisnis opisa i mas go raun lukim ol meri. Taim ol i lukim ol meri, ol i mas skulim ol long wanem rot i stap bilong helpim ol meri long kirapim bisnis. Na tu ol bisnis bilong ol meri i mas pairap na kamap nabaut long ol niuspepa na radio. Olsem bai ol arapela meri i ken lukim na save olsem, wok bisnis, em i no samting bilong ol man tasol.

Planti meri i mas stap insait long ol trening kos i save kamap nabaut. Tasol planti moa long ol dispela kos i mas kamap long planti provins bilong kantri. Na tu, Dipatmen bilong bosim ol bisnis i mas kamapim ol kos bilong givim save bilong wok bisnis i go long ol meri.

● E. Paine

KUKIM GUTPELA KAIKAI

KEK TAPIOK

Samting yu mas i gat:

- 3-pela kap tapiok
- ½ kokonas
- 1½ kap braun suga
- Wel bilong praim kaikai
- ½ tispun sol
- 1 tebolspun plaua.

We bilong wokim:

- Rausim skin bilong tapiok. Pinis yu wasim na skrapim.
- Skrapim kokonas
- Putim tapiok na kokonas, na plaua, na sol na suga wantaim. Tanim gut.
- Orait, wokim raupela olsem ol liklik bal. Praim long wel na bihain yu kaikai.

Dipatmen bilong lukautim bisnis na Yunaitet Nesens i bin putim kamap dispela miting. Ol i laikim ol meri opisa ya long kamapim wanpela we o rot bilong helpim ol meri long olkain bisnis.

Long miting ya ol meri opisa i harim sampela toktok bilong wanem samting i bin kamap long tupela miting bilong las yia. Wanpela miting ya, i kamap long Fiji. Na arapela i kamap long Goroka.



PREN BILONG YU
INAP OLTAIM

Nupela Spot Buk

K2.99
Tasol

Yu laik ritim ol stori bilong ragbi-soka-boksing? Yu laik lukim ol PNG spotman?

Baim Nau



Baim long stua o salim K2.99 long Wantok, PO Box 1982, Boroko.

Mi putim K2.99 pinis. Salim buk i kam long:

Nem:

Ples:

P.O. Box:

Provins:

No ken salim mani. Salim postal oda o sek.



Long Pot Mosbi, 9-pela man meri bilong PNG i wok long kisim wanpela kos. Dispela kos, em i bilong redim ol dispela lain long wok long foren sevis bilong Dipatmen ov Foren Afeas. Kos ya, em bai stap inap 10-pela mun olgeta.

(Ol i sanap, stat long lephan i go long raithan.) Jimmy Ovia (Sentral), Patrick Kila (Sentral), Joseph Zangzang (Madang), Robin Kamkam (Niu Ailan), Joseph Laua (Sentral), Tarcissius Eri (Galf). (Ol i sindaun, stat long lephan i go long raithan.) Lucy Bogari (Noten), Fred Lees (tisa bilong kos), Christopher Mero (Galf) na Alofa Vaki (Sentral).

Long pinis bilong yia ol bai pinisim skul. Na bihain ol bai go wok wantaim Dipatmen ov Foren Afeas pastain. Ol bai wok liklik na bihain ol bai go wok ovasis.

Em i namba wan taim tru bilong dipatmen long holim dispela kos. Bipo ol pipel husat i laik wok wantaim dipatmen i save kisim kos long Edministrativ Koles long Pot Mosbi.

Laik Tambuim Win Mani

Maun Hagen lokal gavman kaunsil i stap insait long Westen Hailans Provins i laik stopim wanpela wok bisnis ol i save kolim Winmani Loteri. Winmani Loteri em i wanpela laik tiket pilai we ol winman bai kisim prais mani sapos

ol i laki. Kaunsil i no amamas tumas long we dispela nupela bisnis i save ran insait long provins.

Wanpela memba bilong kaunsil, kaunsila Andrew Kei, em i bin putim wanpela mosen pinis long ai bilong kaunsil. Mosen bilong Kaunsila Kei i olsem kaunsil i mas salim wanpela pas i go long Westen Hailans Provinsal Gavman long stopim dispela bisnis insait long provins. Winmani Loteri i mekim ol pipel i les.



POT MOSBI SITI KAUNSIL

BAI-ILEKSEN 1980.

PLES NA DE BILONG VOT LONG WOD SIKS (6)

DE NA TAIM SARERE	TIM	PLES BILONG VOT.
26/4/80 8am-6pm.	1	Wod 6 Opis long Gordons.
26/4/80 8am-6pm.	2	Erima Komyuniti Skul.
26/4/80 8am-6pm.	3	Dental Koles.
26/4/80 8am-6pm.	4	Plis Koles, Bomana.
26/4/80 8am-6pm.	5	9 mail Kwari Komyuniti Hol.
26/4/80 8am-6pm.	6	Nasaret Stua.

PLES NA DE BILONG VOT LONG WOD NAIN (9)

DE NA TAIM SARERE	TIM	PLES BILONG VOT.
26/4/80 8am-6pm	1	Gerehu Komyuniti Hol.
26/4/80 8am-6pm	2	Bitapaka Tret Stua.
26/4/80 8am-6pm	3	Gerehu Hausing Komisnin Opis.
26/4/80 8am-6pm	4	Gerehu Komyuniti Skul.

MALEWA KONE,
Man bilong lukautim dispela ileksen.



ILEKTORAL KOMISIN BILONG PAPUA NIUGINI.

POT MOSBI SITI KAUNSIL BAI-ILEKSEN.

WOD 6 NA WOD 9.

TOK SAVE BILONG NOMINESEN.

Mi, Malewa Kone, Opisa bilong lukautim ileksen bilong Mosbi Siti Kaunsil Bai-Ileksen, nau i laik tok save olsem, nominesen bilong ol dispela ileksen i pas long namba 2 de bilong Epril, 1980. Na daun bilo, em nem bilong ol man i resis long ol dispela ileksen. Long vot pepa ol nem bai kamap olsem yu ken lukim daun bilo.

WOD SIKS (6)



Joseph Hau
Matthias Pohai
Henry Hiri
Waiyon Namun

WOD NAIN (9)

Uali Vagiriavi
Manu Raho
Emagu Luke

MALEWA KONE,
Man bilong lukautim dispela ileksen.

Pairapim Bom Nogut



Frans i pairapim pinis wanpela bikpela bom nogut long liklik ailan Mururoa insait long Pasifik. Gavman bilong Niu Silan i tokaut long dispela. Ol i tok, dispela pairap i kamap long Mande apinun, long 24 Mas. Pawa bilong dispela bom i bikpela tru. Dispela kain bom i kilim planti pipel tru bilong Hiroshima, Japan, em i manki nating. Pawa bilong em i olsem 50 kiloton tasol. Pairap ya i kamap insait yet long Frans Polinesia, wanpela kantri aninit long gavman bilong Frans.

Long wanpela kibung wantaim ol niusman long Pot Mosbi i no longtaim i go pinis, Praim Minista Sir Julius Chan i tok, em i no laikim dispela kain. Em i tok, em i

no laik harim moa tok olsem, Frans i pairapim bom bilong ol yet long Pasifik. Ol i mas stop. Em i tok, ol pipel i mas tingim gutpela sindaun bikain. Em i tok, em i

tu. Ol i no ken tingim tasol long ol yet.

Minista bilong Difens bilong Frans, Mista Yvon Bourges i tok, olgeta toktok long dispela pairap,



em i tokwin tasol. Frans i no pairapim wanpela bom. Tasol sampela ripot i tok olsem, Mista Bourges i bin stap long ailan Mururoa long taim bom i pairap. Em long Mas 24.

Long 1969, i kam inap nau, Frans i pairapim moa long 55 bom insait long Saut Pasifik. Tupela pairap bilong 1978 i nogut tru. Dispela pairap i kilim dai sampela pipel na bagarapim sampela liklik ailan.

Embesi bilong Frans long Pot Mosbi i tok, gavman bilong ol long Frans i no tokim ol long wanpela samting yet. Dispela pairap i kamap tru o nogat, em ol i no save.

Wanpela grup, Nuklia Fri Pasifik Komprens long Hawaii i salim wanpela strongpela tok i go long Embesi bilong Frans long Wasington DC, biktaun bilong Amerika. Dispela strongpela tok, i tok, dispela grup i no laikim moa pairap i kamap. Ol i salim dispela tok, sampela de bipo tasol long pairap i kamap long Mas 24. Taim pas i flai go long Amerika, ol pipel bilong Hawaii i holim protes mas autsait long Embesi bilong Frans long Honolulu.

Dispela grup (NFPC) i tingting long holim kibung bilong ol long Honolulu stat long Me 10.

● Franzalbert Joku

Tret Komisisina Bilong Australia

Dispela komisisina bilong lukautim ol wok bisnis bilong Australia, em i ken tokim yu we yu ken baim ol samting long Australia.

Ating yu laik painim sampela nupela stua bilong baim ol kain samting.

Ating yu laikim sampela nupela masin o tul bilong wok.

Ating yu laik painim sampela nupela samting bilong putim long stua bilong yu . . .

Yu askim tasol dispela saveman bilong Australia

Em inap tokim yu, wanem kain kain bisnis i stap long Australia na tu wanem kain samting ol i save salim.

Em inap skulim ol PNG bisnisman we ol i ken salim samting bilong ol long Australia.

Sapos yu laik em helpim yu, yu rait tasol i go long :


The Australian Trade Commissioner, Box 9129, Hohola, Papua Niugini.


O yu ken ring long dispela namba, 25 9333.

Yu inap baim planti gutpela samting long gutpela prais na ol samting i stap klostu tasol long yu



Askim Australia Trade Commissioner





Tupela pilaia bilong Snafu Taigas bilong Niu Ailan i laik sutim wanpela Mosa Taigas bilong Kimbe long graun. Ol i pilai long Lae. SNAFU i winim dispela pilai.

Kembris Kap

Bratas Ragbi Lig tim bilong Mosbi i apim nem bilong Sauten Zone bihain long taim ol i winim Kembris Kap long Lae long 7, Epril. Mosbi Bratas i kamap sempion na kisim taitel taim ol i autim Kainantu Bratas. Mosbi Bratas i putim 44 poin na Kainantu i putim 16 poin tasol.

Samting olsem 2,500 pipel i bin lukim dispela pilai long olgeta de. Mosbi Bratas i go insait long fainol long wanem ol i no lus long wanpela pilai stat long Fraide nait i kam inap Sande.

Mosbi Bratas i winim Lae Warathas 11-3 long Fraide nait. Na ol i winim gen Rongo Taigas bilong Goroka 15-13 long Sarere. Long Sande ol autim tiket bilong Hagen Bratas i stap sempion long dispela taim na ol i holim Kembris Kap long 2-pela yia olgeta. Ol i winim long las yia na yia bipo. Nau ol i kam daun

Kepten bilong Rongo Taigas, Stanis Sapu givim 60 i go long putim gol. Koavea Kose bilong Lae Warathas i ran bihainim em. Ol i pilai long Kembris Kap long Ista Wiken.



na salim antap long Mosbi Bratas. Em i namba tu taim nau wanpela tim bilong Sauten Zone i winim dispela kap. Long yia 1977, Paga Pantas bilong Mosbi i winim. Taim ol Bratas i winim dispela Kembris Kap, ol i kisim K3,000 (3 tausen kina winmani. Kainantu Bratas husat i kamap namba tu i winim K1,000 (1 tausen kina). Ela Magani bilong Hagen i kamap namba tri na ol i winim K500. Hagen Bratas i kamap namba 4 ples.

Mosbi Bratas i win long wanem olgeta pilaia bilong ol i sanap wantaim na pilai. Kain hap man olsem Konze Kara, Timi Pirit, Simon Girty na Alfred Katmale i pilai gut tru long helpim Bratas i win.

Ol arapela Ragbi tim husat i kamap long traime na winim dispela Kap em Warathas bilong Lae. Mosa Taigas bilong Kimbe, Rongo Taigas bilong Goroka na Snafu bilong Kavieng. Tarangu ol i lus olgeta.

Meiwe Launa bilong Mosbi Bratas i trai hat tru long rausim Brata bilong Hagen. Sori Hagen, Mosbi i win na kamap sempion pinis Mosbi winim Hagen 28-12.



Francis Biroro bilong Mosbi Bratas i redi long tromoi bal. Hagen Bratas Joe Tomerop i les pinis na sanap long baksait. Mosbi i autim Hagen 28-12.



Ol Ela Magani bilong Hagen i traime kamautim wanpela Kainantu. Sori Ela Magani i lus — Kainantu kamap namba tu tim.



Snafu bilong Kavieng autim bal. Em pret, nogut Mosa Kimbe i kisim. Snafu i win. Ol pilai long Lae long Kembris Kap.

Poto — Donaldson Muraba

Winim Smok



Dimiyasi James

Ol dokta lukautim ol hausik i tok, smok, em i wanpela samting nogut. Em i save bagarapim bodi bilong ol man. Tasol ol pipel i no harim tok liklik.

Namba bilong smok, ol stua i salim, i wok long sut i go antap moa yet long olgeta yia. Prais bilong ol smok tu i go antap moa yet. Tasol ol pipel long PNG i no wari.

Planti ogenaisesen na grup na wan wan man meri i wok long grisim ol pipel long no ken smok.

Em hia stori bilong wanpela man husat i as tru bilong smok. Tasol wanpela de, em i pait wantaim pren bilong em, "Peket Kembris". Na nau tupela i no moa pren.

Dispela man ya, nem bilong em, Dimiyasi James. Em i wanpela Komyuniti skul tisa. Dimiyasi, em i bilong Namowa viles long Dobu Ailan long Esa'ala Distrik insait long Milne Be Provins.

Em i gat 45 krismas nau. Em i tok, taim em i yangpela boi yet, nogat man inap winim em long smok. Olgeta nait em i save stap na mokim planti peket Kembris tru. Buai, em i pipia nating long ples bilong em. Olsem na, em i save pinisim gut tru ol rop buai i stap long haus. Dimiyasi i tok, taim ol pren i kam lukim em, em bai haitim gut tru ol buai na smok bilong em. Em i save tokim ol olsem, buai na

smok i pinis. Tasol nogat. Ol samting i hait stap long wanpela kona bilong haus.

Em i tok, i tru yupela bai tok olsem mi pasim ol samting i stap long mi wanpela. Na em i rabis pasin. Tasol sapos mi givimaut ol smok na buai bilong mi na sapos i pinis long nait, mi bai kisim we?

I go i go, long wanpela de, em i go long wanpela stua long baim smok. Stua ya i stap long Panaeati long Misima Ailan, we em i stap wok. Em i go na lusim bikpela mani long wanpela peket kembris. Prais bilong smok i bin go antap.

Em nau, na em i ting sapos em i smok yet, bai em i lusim nating bikpela mani. Na fotnait bilong em tu i no bikpela. Ol i save peim em K57 tasol. Em i gat 11-pela pikinini olgeta.

Olsem na taim em i go bek long haus, em tingting planti tru. I go, i go na em i promis long no ken smok moa.

Wantok ripota i go kisim dispela stori long en. Em i stap nau long Pot Mosbi Tisas Koles. Em i toktok na amamas tru.

Dimiyasi i tok, dispela tingting bilong stopim smok, em i wanpela gutpela eksampel tru em i soim ol skul pikinini. Ol tu i mas tingting long no ken lusim bikpela mani nating long smok.

● Franzalbert Joku

TCM[®] FRONT END LOADER STD15

ALL WHEEL DRIVE ARTICULATED STEERING


**GUTPELA WOKMAN.
EM I STRONGPELA NA EM
I GAT BIKPELA SAVOL TU.**

DISTRIBUTED BY:



NEW GUINEA MOTORS

THE TRUCK PROFESSIONALS



Port Moresby
P.O. Box 1970
BOROKO.
Phone: 253644
Telex; AUTO NE22124

Lae
P.O. Box 54
LAE.
Phone: 423477
Telex: AUTO NE42593

Mt Hagen
P.O. Box 459
MT. HAGEN.
Phone: 521035


Goroka
P.O. Box 579
GOROKA.
Phone: 721511

Kieta
P.O. Box 128
KIETA.
Phone: 956179

Rabaul
P.O. Box 311
RABAUL.
Phone: 926171

Kimbe
P.O. Box 9
KIMBE.
Phone: 935191

Morata Senta



Ol mekanik wok i stap.

Hia Laions Klap bilong Pot Mosbi i kirapim pinis wanpela Vokesenal Skul long Morata. Ol memba bilong dispela klap i save wok long Sarere, na taim bilong ol long malolo long kirapim ol klasrum long dispela skul. Olgeta wok i pinis long 1977, na Mista Kwalimu Kalo, bos bilong Teknekol Divisen, i opim dispela skul.

Dispela skul em bilong ol manki tasol. Na ol i save skulim ol sumatin long wok mekanik, kamda, welding na wok didiman. Planti bilong ol sumatin husat i go long dispela skul, i lusim skul long Gred 6 tasol.

Long dispela yia, i gat tripela. Menesa bilong dispela skul em wanpela tisa bilong Pili-pino, Mista Cayago. Em i wok inap tupela yia nau long dispela skul.

pawa na wara bilong skul. Na tu ol kain samting olsem ol plang, kapa, na ol arapela samting bilong skul.

Long taim ol dispela manki i pinisim tupela yia long dispela skul, ol i save go painim wok wantaim ol bikpela kampani insait long Mosbi. Sampela manki husat i skul long wok kamda nau i painim wok wantaim Morobe Konstraksen. Ol manki i skul long mekenik i save painim wok wantaim ol sevis stesin insait long siti.

Ol manki long dispela skul ol i hepi long ol samting ol i lainim insait long dispela skul. Planti bilong ol inap raskol nabaut long taun sapos ol i no gat kain skul olsem long go na kisim save.

● Anna Rongap



Mista Cayago

Ol tisa long dispela skul, em Edukesen dipatmen i saplai.

Mista Cayago i tok olsem ol sumatin yet i save mekim ol liklik wok nabaut long taun na kisim mani long helpim skul bilong ol.


Wok Mekanik

Sampela samting ol i save mekim em long fiksिम ka bilong ol pipel, putim banis raun long haus, na makim ol haus. Sampela taim ol i save go fiksिम ol samting i bruk. Mani ol i kisim long dispela ol wok, em ol i save baim

Tasol i gat wanpela samting Mista Cayago i no amamas long en, em long ol raskol i save go stil long dispela skul. Mista Cayago, i tok olsem em bai toktok wantaim ol lida bilong Morata long dispela pasin ol raskol i save mekim. Las yia ol sumatin bilong skul yet i painim mani na baim sampela waia na ain. Orait ol i putim bikpela banis raun long skul. Tasol dispela i no stopim ol stilman. Ol i wok long stilim yet ol samting bilong skul.



Ol manki wokim ol srang na tabol long senta. Ol bai salim long kisim sampela mani.



MORTEIN TASOL I KEN KILIM OL BINATANG KWIKTAIM

dispela pisin yumi lukim oltaim nau igo long Australia!

Air Niugini tasol i save i go i kam long Australia 8-pela taim long wanpela wik. Mipela i save flai planti taim. Na mipela i save givim servis long we yu yet laikim. Mipela i save flai i go long Sydney na Brisben na Cairns.



mipela igat gutpela Fraide Sevis



Air Niugini tasol inap givim yu gutpela Fraide nait servis i go olgeta long Sydney. Balus i save kirap long 5 klok apinun long olgeta Fraide. No ken tingting long lusim wok hariap long go kisim balus. Nogat. Na dispela balus i save go olgeta long Sydney. Sampela balus i save mekim ol pipel i stap wan aua nating long Brisben. Tasol mipela nogat. Na tu, servis bilong ol dispela "Bird of Paradise", em i nambawan tru. Ol arapela balus i save mekim ol pipel i sanap long longpela lain. Tasol mipela nogat. Tingim gut: Air Niugini tasol, em i nambawan we bilong flai.

Ringim tasol Air Niugini Intenesenal Resevesen bilong kisim moa tok save o bilong buk-im balus. Em hia namba, 252066. O yu ken ringim tu husat man i lukautim ran bilong Air Niugini balus long hap bilong yu.



THE NATIONAL AIRLINE OF PAPUA NEW GUINEA

SPS061



Dia Edita — Mi laik bekim pas bilong wantok ya, Pius Kakuambi bilong Aitape, WSP. Pas i kamap long Sarere 15 Mas 1980.

Yes Brata, long pas

bilong yu, yu stori long ol meri Wes i save maritim ol save man tasol na gred 6 manki em no gat tru. Laka brata Kakuambi yu mas rong tru long daunim poin bilong ol meri Wes ya.

Na mi laik bai yu mas save gut pastaim. Ol meri em laik bi-

long ol tasol. Sapos ol i laik maritim save man o gred 6 skul manki em laik bilong ol tasol.

Olsem mi wanpela manki Wes na mi laik sapotim toktok bilong ol meri Wes. Brata ating sapos yu traim hat tru orait, yu ken maritim meri Wes. Yu save pinis

Meri Wes Strongpela Tim

meri Wes strongpela tim stret. So brata Kakuambi sapos yu gat belpen orait rait tasol i go long Wantok Niuspepa bai mi lukim.

Mike Aisome, Binnen Bakery, Madang Provins.

Salim ol pas i kam long:
WANTOK
BOX 1982
BOROKO

long ples yet em yu no gat laik long en. Em nau bai yu pilim olsem wanem? Mi laik bai yu tingting long dispela na skelim gut toktok bilong yu. Brata sapos yu bel hevi rait tasol i kam long Wantok Niuspepa na yumi ken lukim.

Mary Beata Mena, Bogia, Madang Provins.

Meri Ken Marit Longwe

Dia Edita — Plis inap yupela i larim liklik spes long pepa bilong bekim wari bilong brata ya, Joseph Merau i bin kamap long Wantok Nius Sarere Februeri 1980.

Yes brata, wari bilong mi i olsem yu no laik lukim ol meri i lusim papamama na ples bilong ol yet na go maritim long ol longwe ples.

Em i stret, dispela toktok bilong yu i tru

tasol ating yu lusim tingting long wanpela samting "Love" o strongpela laik. God yet i putim Love insait long yumi wan wan.

Sapos wanpela meri i stap na lukim wanpela longwe ples man na insait bilong em i pilim olsem em i laikim em tru. Em i laik bilong em. Sapos papamama i stopim em na makim em long wanpela man bilong asples yet we em i no gat Love o laik

long em, yu ting bai maritim laip bilong tupela bai stap gut o olsem wanem? Mi ting bai kros pait bai i go yet insait long maritim bilong tupela. Mi ting i no gat rong long meri i maritim long man bilong longwe ples.

Brata, yu traim putim dispela tingting long yu yet. Sapos yu laik long maritim wanpela meri long narapela ples na papa mama i kirap na tok yu mas maritim meri

Baim Gut Kopi Na Lombo



Dia Edita — Nau mi laik autim liklik wari bilong mi. Mipela ol pipel bilong Nuku eria yumi save salim bisnis Kopi, lombo, rais na ol SPCA i no save baim mipela gut tumas. Plis mi laikim bai yupela

ol kaunsil bilong mipela i mas pait hat long dispela samting. Olsem tasol bai SPCA bai putim mani i go antap long ol bisnis bilong mipela.

Olgeta samting i save kamap long maus bilong yupela ol

kaunsil tasol. Em tasol liklik wari bilong mi. Sapos yu pilim olsem wanem rait tasol long Wantok bai mi lukim. Mi wanpela prealida bilong C.M. Mukili.

Pius Hambon, Nuku, WSP.

Wokim Singsing Bilong Aba

Dia Edita — Inap long yu putim wari bilong mi long Wantok Niuspepa. Mi laik tok olsem.

Mi amamas long ol pilai gita singsing insait long Niugini ailan. Tasol i gutpela

inap long ol i kamapim wanpela singsing na singsing long nam-ba wan boksa bilong yumi, John Aba.

Mi harim olsem bipo Martin Beni i stap sempion long boksen, ol Niu Kry-

mus i bin kamapim singsing bilong Martin Beni. Olsem wanem, nau John Aba i sempion long boksen mipela i no laik kirapim wanpela singsing long nem bilong em. Mi laik bai Niugini ailan i mas kirapim wanpela

singsing bilong Sempion bilong yumi long wanem ol i gat planti ben i stap long hap bilong ol. Em tasol wari bilong mi. Tenkyu.

S. Oa, Madang Provins.

Givim K1 Pinis Kisim Bot Pipel

Dia Edita — Long ai bilong mi wanpela samting i no stret. Planti raskol i save pulap long Koki maket bas stop. Ol i save stopim ol man na tok, "Yu i gat mani orait yu mas givim mi."

Ol i save holim ol poket naip na ol i save tok. Na mipela i save givim mani long ol. Mi bin givim K1 olgeta.

Dispela pasin i no stret long ai bilong mi. Mi laikim ol bikman bilong Plis mas salim ol plis na ol mas was long dispela taim. Long 4 klok long apinun i go inap 5 klok.

Em tasol liklik wari bilong mi. Yu husat man raskol yu laik bekim orait rait tasol long Wantok Niuspepa na mi ken lukim.

Peter Sokame, Walu Viles, SHP.

Dia Edita na ol bratawantok — Em wari bilong mipela ol prea lida bilong Kafle paris long ol Vietnam kantri i bagarap.

Bikpela wari bilong mipela em sapos gavman i tok orait long yumi ken kisim ol pipel bilong Vietnam i kam insait long PNG, mipela i ken givim graun long ol.

Sapos yumi PNG,

yumi kristen kantri orait yumi mas kisim ol dispela Vietnam pipel. Em bai God i amamas long yumi.

Sapos yumi i no helpim ol, bihain God bai sasim yumi.

Em tasol wari bilong mipela.

Ol Prea Lida, Kafle Paris, Sandaun Provins.

Pikinini bilong Pisin

Bipo bipo tru mipela i gat wanpela pisin o save stilim ol pikinini. Nem bilong em, Masianagai. Em i wanpela bikpela pisin tru, olsem tarangau. Tasol, em i wanpela man tru i tanim olsem pisin.

Orait, wanpela de tupela nupela marit i gat nupela bebi. Tupela i go long wok long gaden. Na tupela i hangamapim klostu long tupela na nildaun mekim save long wok gaden.

Taim tupela i nildaun long wok gaden, dispela bikpela pisin i isi tru i kam na autim pikinini wantaim bilum. Em i autim hariap tru na i karim em i flai i go.

Tupela marit i lukim olsem na ol i kraik singaut na tok, ai, yu karim bebi bilong mitupela i kam bek. Tasol pisin ya i no harim tupela. Em i flai i go antap long wanpela bikpela diwai talis.

Tupela marit i singaut singaut i go na nek bilong tupela i sot. Tupela i sanap tasol na stat tromoi han. I go i go na han bi-

long tupela tu i tait. Tupela i stap i go inap tudak i kamap na tupela i go long ples na slip.

Bebi ya i wok long kraik long susu. Na pisin i wok long giman givim em kain kain kaikai. Tasol liklik bebi i no pinis kraik. Bihain em i givim bol bilong em long bebi ya. Em nau, bebi i pinis kraik. Em i sindaun isi na pilai toktok i stap.

Tupela i stap i go sampela yia bihain na bebi ya i kamap wanpela draipela yangpela man tru.

Taim em i kamap bikpela pinis, em i askim papa bilong em olsem, hey papa, mama we? Papa bilong em i tok, mama bilong yu i dai pinis taim yu liklik yet.

Em i kirap na askim gen papa bilong em, na papa, mi kaikai wanem na mi kamap bikpela. Papa bilong em i tok, yu lukluk i go long hap. Em gaden bilong mi i stap long hap. Yu ting yu bikpela nating.

Man ya i amamas tru

long papa bilong em. Na em i wok long bihainim ol han bilong diwai talis i go i kam olsem ples graun tru bilong em.

Bihain em i askim papa bilong em, hey papa, bai mi sindaun we na kom? Na papa bilong em i tok, yu bihainim dispela han diwai i go long hap na sindaun komim gras bilong yu.

Taim em i laik go daun na kom, em i lukim tupele yangpela meri i pulim apim wara i stap. Em i no bin save olsem piksa bilong em i go kamap long wara ya.

Bikpela susa i lukim piksa bilong man ya insait long wara na man ya i luk nais tru. Olsem na namba wan susa i kirap hariap tru na mekim wara i doti. Em i pret, nogut liklik susa bilong em i lukim tu. Liklik susa i kirap na helpim bikpela susa long mekim wara i doti. I go i go na taim tupela i larim wara i laik klia, tupela wantaim i lukim dispela man i sindaun lap long tupela i stap.

Tupela i kirap na ran i go long ples na tokim papa bilong tupela. Na tupela i askim papa tu olsem, papa inap long yu salim tok i go long ol lain bilong yu i kam katim daun wanpela diwai bilong mitupela. Mitupela i bin lukim wanpela gutpela samting. Mitupela bai maritim wanpela gutpela man.

Na papa bilong tupela i kilim ol pik, pasim buai na brus na salim i go long ol lain bilong em. Em nau na ol lain bilong ples bilong em i makim wanpela de ol bai kam na katim daun dispela diwai.

Dispela de i kamap na ol i go long katim. Ol i katim dispela diwai i go i go inap sampela wik olgeta. Na taim dispela diwai i bruk, dispela man ya i kalap i go anit long ol lip bilong diwai na hait i stap. Ol man i wok long traime painim em i go i go tasol ol i no painim em. Na ol i kirap na lusim na i go long ples bilong ol.

Na tupela meri ya i hait klostu long as bilong dispela diwai. Tupela i

stap i go i go klostu long apinun, man ya i ting olgeta man i go long ples pinis. Em i kirap long ples em i hait long en na em i kam autsait. Em i kam na sindaun stret long as bilong diwai we tupela meri ya i hait i stap long en.

Taim em i sindaun i stap, tupela meri ya i kam isi tasol na holimpasim em. Man ya i tok, plis lusim mi i go. Tasol tupele meri ya i tok, plis kam wantaim mitupela long

ples bilong mitupela.

Em i harim tupela na i go wantaim tupela. Ol i wokabaut i go long rot, na bikpela susa i askim liklik susa olsem, husat bai maritim em? Mi o yu? Na liklik susa i kirap na tok, maski mitupela i lukim em wantaim. Oke, mitupela i mas maritim em wantaim.

Tupela i wok long toktok kros i go kamap long papa bilong tupela. Papa bilong tupela i skelim toktok i go i go na em i tok, yu bikpela susa bai maritim em. Olsem na bikpela susa i maritim em na liklik susa no gat.



Olsem na nau, yu ken lukim, ol namba wan, pikinini i save marit long asples. Na ol namba tu o namba tri i save marit i go longwe.


Maryanne Dubanau, Wagi Viles, Bogia. Madang Provins.



TRY YOUR LUCK

HURRY

BUY NESCAFÉ OR IDEAL MILK NOW AND TRY TO WIN ONE OF THE RADIO CASSETTES THAT ARE BEING GIVEN BY NESTLÉ



GOOD LUCK
from

WRITE YOUR NAME AND ADDRESS ON THE BACK OF A NESCAFÉ OR IDEAL MILK PAPER LABEL. PUT IT IN AN ENVELOPE AND ADDRESS IT TO:-

NESTLÉ,
P.O. BOX 1359,
BOROKO,
PORT
MORESBY



KEEP ON TRYING
This week's winner is
SILEHI SAMUEL
of East New
Britain Province
There's 4 more
RADIO CASSETTES
TO BE WON



HEB 152

NESCAFÉ AND Ideal MILK




Papa I Pait Wantaim Pikinini

2 Samyue 1 17:24 - 18:9

OL SOLDIA BILONG ABSALOM I WOK LONG PAINIM TUPELA MAN I BIN KAM NA KISIM TOK I GO LONG DEVIT. TAIM OL I NO PAINIM TUPELA OL I GO BEK LONG JERUSALEM. NA LONG DISPELA TAIM TASOL DEVIT WANTAIM OL MAN BILONG EN I KAMAP LONG TAUN MAHANAIM.

LUKIM. MI BRINGIM SAMPELA KAIKAI NA BLANKET. BOSMAN BILONG MI I GIVIMMI BILONG GIVIM LONG KING DEVIT.

GOD BAI I MEKIM GUT LONG YU. TOKIM BOSMAN OLSEM, BAI MI NO KEN LUSIM TINGTING LONG GUTPELA PASIN BILONG EN.



Poto ya i soim sampela saveman bilong Tok Pisin wantaim tok bilong Baibel i wok wantaim long tanim sampela buk bilong Olpela Testamen i go long Tok Pisin. Kirap long lephan yu ken lukim Pater Mihalic (papa bilong Wantok Niuspepa), James Ayong (wanpela man bilong Semineri bilong Engliken Sios na em i kam long Wes Niu Briten), Dokta David Clarke (saveman bilong tok Hibru, em tokples bilong Olpela Testamen na tok ples bilong Jisas yet), na Paul ToLuana (wanpela katekis na tisa bilong Is Niu Briten na Kiniginunan).

I luk olsem Olpela Testamen bai pinis long yia 1983 samting. Baibel Sosaiti i tok, tude ol i bin tanim sampela hap bilong Baibel long 1,631 kain kain tokples bilong ol kantri bilong graun. Olpela Testamen i pinis olgeta long 266 tok ples; na Nupela Testamen long 420.

KWIKTAIM DEVIT I LAINIM AMI BILONG EN NA WETIM TOK LONG ABSALOM BAI I KAM.

ABSALOM NA OL SOLDIA BILONG EM I BRUKIM WARA JODAN PINIS.



GUTPELA. SAPOS YUMI GO HARIAP YUMI YET I KEN MAKIM PLES BILONG PAIT.

ORAIT JOAP. TOKIM OL LONG WOKABAUT NAU. BAI MI GO WANTAIM.

NOGAT YA. YU NO MAN NATING. YU STAP NA SAPOS MIPELA I SOT LONG SAMTING YU MAS SALIM I KAM KWIK LONG MIPELA.

SAPOS YU TING OLSEM, ORAIT MI KEN I STAP.



TUPELA I SANAP I STAP LONG DUA BILONG TAUN.

ABSALOM EM I PIKININI BILONG MI, OLSEM NA YUPELA NO KEN BAGARAPIM EM. MI SAVE LAIKIM EM YET.



Used by permission of the David C. Cook Foundation. Copyright 1973. David C. Cook Publishing Co. All rights reserved.

Komik hia i kamap pinis long buk. Yu inap baim long olgeta Kristen Buk Stua.

Sande Lotu

Frank Mihalic

11 Me 1980

SANDE NAMBA 6 BILONG ISTA

- Jon 14: 23 - 29.

Long rit bilong tude yumi go bek long Gut Fonde Nait. Jisas i sindaun mekim las kaikai wantaim ol disaipel bilong em. Em i givim planti skul long ol nau. Long tumora bai em i dai. . . .tasol ol i no save yet. . . .Em i tokim ol tasol, em bai lusim ol. . . .na bihain bai em i kam bek gen. Em i save pinis ol i bel nogut tru long dispela na bai ol i longlong nabaut. Ol bai pilim olsem wanpela lain pikinini i lusim papa bilong ol.

olsem ti, tiii tititi, tititi. . .ol dispela i makim wanpela kain toktok. Na planti man i save ritim. Win antap long graun bilong yumi i pulap long ol dispela kain tok hait, na olkain tok olsem i go i kam, i flai nabaut. Planti sip na balus na ples i kisim tok olsem.

Long dispela taim Jisas i promisim ol, bai Holi Spirit bilong em i kamdaun long ol wan wan. Jisas tu bai i stap wantaim ol. . . .Dispela Holi Spirit bilong em bai gat tupela wok: em bai skulim ol na helpim tingting bilong ol. Na em bai bringim bek long tingting bilong ol, ol dispela samting ol i bin harim long Jisas pinis. Dispela em i wanpela smatpela aidia. Jisas bai putim Holi Spirit insait long wan wan. Na taim wan wan i sot long save, bai Holi Spirit i givim long em. Na sampela taim disaipel i laik mekim wanpela tok, o mekim wanpela wok, tasol em i no save tru em i mas bihainim wanem rot, orait, Holi Spirit bai stiaim em. Holi Spirit bai bringim bek long tingting bilong em olgeta samting Jisas i bin tokim em bipo, tasol em i bin lusim ting long en.

Insait long laip bilong yumi wan wan, olgeta de i gat planti dispela kain tok i kamap. Dispela i kamap long Holi Spirit. Na em i save yusim olkain we na rot bilong helpim yumi na givim save long yumi na stiaim yumi. Sapos yu bilip strong long dispela wok bilong Holi Spirit insait long yu tude na nabaut long yu, bai yu painim tok bilong em i kamap long planti we na rot moa.

Tude yumi tu i gat dispela Holi Spirit i stap wantaim yumi. . . .I no samting bilong ol disaipel tasol. Na Holi Spirit i gat planti we na rot bilong stiaim tingting bilong yumi na laip bilong yumi. Yumi kolim dispela samting "tok insait." Em i olsem wanpela tok yumi save harim insait long bel bilong yumi, wanpela i kamap nating, wanpela tok save i kamap, wanpela tok lukaut, wanpela tok tambu.

Yu tingting long laip bilong yu nau. Yu tingting long ol kain kain samting i bin senisim laip bilong yu. Ating yu bin bungim wanpela man o meri wanpela de. Ating yu bin mekim o harim o ritim wanpela tok. . . .Ating yu bin go long wanpela ples, long wanpela lotu, long wanpela haus. . . .Ating yu bin ritim wanpela buk. . . .Ating wanpela de yu bin painim bikpela amamas tru. . . .o wanpela man/meri i dai yu belpas olgeta. . . .Ating yu lukim wanpela gutpela eksampel. . . .Ating yu pilim samting insait i pulim yu long mekim wanpela samting. . . .Ating yu kisim sampela nius.Ating yu mekim wanpela beten. . . .Ating yu lukim nupela samting i kamap. . . .Ating yu lukim pes o ai bilong wanpela man o meri. . . .Ating wanpela sik birua i painim yu. . . .Ating wanpela taim nogut i kam insait long laip bilong yu.

Sapos yu pilai nabaut long redio wanpela taim na yu tanim nabaut ol liklik handel bilong em, long sampela ples long redio yu ken harim sampela liklik nois

Olgeta dispela kain samting i ken senisim laip bilong yu. . . .Na God, na Holi Spirit i save wok insait long ol dispela liklik ti titi long redio. . . .Ol i olsem tok save i go long yu stret. . . .



Tarzan

by EDGAR RICE BURROUGHS



BIABIA



TOK SAVE LUKAUTIM MERI

Poto hia i soim Ari Areng bilong Aitape na Patricia Wood bilong Niu Silan. Tupela i sanap long gaden bilong Lilinikai Plantesen long Bainings, Is Niu Briten. Ol i kisim poto long 1935,

Patricia i stap nau long Niu Silan na wari long Ari. Em i laik save em i stap yet o nogat. Bipo Ari i go long Rabaul em i stap long wampela skul bilong misin long Aitape.

Sapos yu husat man o meri i save long Ari orait rait i kam long Wantok. Box 1982, Boꝛoko.



1	2	3	4	5	6	7
8			9			
	10		11			
12		13		14	15	
16				17		
18			19			

Namba 74: Lo Na Oda

Stret: 1. Olsem putim long haus kalabus. 8. Abus. 9. Man/meri i save givim skul. 10. Sayor. 11. Wampela kaikai. 12. Ples bilong stretim ol pait o trabel. 14. Tul bilong brumim gras. 16. Mani bilong kantri Itali. 17. Hap bilong maus. 18. Olgeta soldia bilong kantri. 19. Bipo long Independens em i stap bos bilong gavman stesin.

Daun: 1. Ol soldia i stap long kantri. 2. Autim nem long kot. 3. Namba. 4. Peim bek ol rong. 5. Hat bilong pop. 6. Olsem 'i no hatwok'. 7. Olsem raifel, sotgan. 12. Olsem pent. 13. Taun long Sauten Hailans. 15. Bikipela hap graun. 17. Wampela dring.

Ansa Bilong Namba 73:


Stret: 1. Lam. 2. Ralf. 5. Mekenik. 7. Spak. 9. Ats. 11. Pam. 12. Naip. 14. Sodaim. 15. Plais. 16. Sanpepa.

Daun: 1. LMS. 2. Rek. 3. Ana. 4. Litimap. 6. Kamda. 8. Paola. 10. Spana. 12. Naip. 13. Ais. 14. SP.



Lephan: Robert Makai bilong Guria tim i flaim bal i go. Em pret nogut Stalin bilong Yuni tim i kisim. Yuni win 2-0 na winim Hara Kap.


Daunbilo: Kepter: bilong Yuni, Kisakiu Posman (lephan) i laik wok-im Kung-Fu long Mathew Itar bilong Guria. Bal i ranawe pinis.



Gabriel Pise na Muraba Monagi bilong Yuni i no inap holim Peni Waho bilong Guria. Tasol bihain tupela i givim Peni tupela kiau na winim Kap.

ENTRY FORM

Makim Bal Pilai Resis



Dispela pilai resis, em i isi tru. Yu inap winim sampela gutpela prais tru.

Lukim ol pilaia antap. Orait, kisim namba bilong wan wan pilaia na putim dispela namba long bal em bai yusim long kain pilai bilong em.

Pinis, orait, bekim tok bilong kwesten daunbilo (nem na adres). Las tru, yu mas raitim nem na adres bilong yu long pepa antap bilong kol pawa peket. Na salim i kam long dispela adres:

**COLD POWER
COMPETITION
P.O. BOX 336
PORT MORESBY**

EM I SAVE WOK
LONG KOL WARA

NEM : _____

ADRES : _____

Wanpela K30 prais long wan wan wik. NA Yu inap winim ol Adidas samting long mak bilong K50.



Salim planti long laik bilong yu. Tasol insait long wanpela skinpas, yu mas i gat wanpela resis fom na wanpela pepa antap bilong kol pawa peka. No ken putim tupela or tripela long wanpela skinpas. Olgeta wik, i go inap long 5-pela wik, mipela bai putim ol nem long basket na kamautim wanpela. Nem



bilong husat i kamap, em bai winim K30.

Namba 6 wik, olgeta nem bai go insait long basket wantaim nem bilong husat mipela pulim, em bai winim ol adidas samting. Prais bilong ol samting ya, bai i go olem K50. Mipela bai rait na tok save long ol wina. Man lukautim dispela pilai resis, em tasol i bos.

Yuni Win

Long Ista Mande, Epril 7, Yuni i daunim Guria long winim Hara Kap fainol. Yuni i win 2-0. Las yia, ol i winim na long Mande wik i go pinis, ol i winim gen.

Pilai bilong Hara Kap i stat 8-pela wik i go pinis. Olgeta pilai bilong Yuni tim i kam inap long fainol, ol i winim. Ol i no lus long wanpe-pilai bilong ol.

Dispela fainol namel long Guria na Yuni i no isi. Tupela tim wantaim i kik strong moa long tra-im winim dispela kap. Guria i bosim namba wan hap bilong pilai. Ol pilai bilong Yuni i wok long tra-im pasim Francis Wabi na Andrew Waho long no ken sutim gol. Tupela Guria strai-ka ya i givim hat taim tru long ol fulbek bilong Yuni.

Tasol goli bilong Yuni i sanap olsem

kurita na tromoi han long pasim olgeta bal. Alan Dindilo wantaim John Tubs na Kas Terry i sanap long fulbek na smok-im gut tru ol strai-ka bilong Guria. Long pinis bilong namba wan hap, tupela tim wantaim i no putim gol.

Na long namba tu hap, taim ol i go bek gen, stail bilong pilai i narakain tru. Man, pilai bilong ol i luk gut tru.

Bal i go i kam tasol



Husat bai kamap pes na kisim bal? Kisakiu Posman bilong Yuni na Petu Ayamiseba bilong Guria i resis long holim pasim bal. Kisakiu i kisim bal na tim bilong em i givim 2 gol long Guria. Ol i pilai long Boroko long Ista Mande.

long lek bilong ol pilai bilong Yuni. Strai-ka bilong Yuni, Perrie Quaze i kisim bal klostu tasol long mak bilong Guria. Em i trik-im gut ol fulbek na em i sutim namba wan gol bilong Yuni. Faiv minit bihain, Muraba i kisim bal long namel na trik-im gut tru ol pilai bi-

long Guria. Klostu long mak bilong Guria nau, em i salim bal i go long kepten, Kisakiu Posman. Kepten bilong Yuni tim i no guria. Em i saitim bal isi tasol i go insait


long mak. Em namba tu gol bilong Yuni.

Moses Murray na Jassper na Philip Ragi i pilai hat tru long Yuni tim. Laky Vavine, goli bilong

Guria i pilai hat tru na pasim planti bal ol strai-ka bilong Yuni i wok long sutim i go long mak. Francis Wabi tu i trai hat long Guria.

Namba tu prais i


go long Guria. Selan Polum wantaim tim bilong em, PWD i pilai hat tru long winim namba tri prais. Ol i winim Sunam tim. Na Sunam i kisim namba foa prais. ● Rainsau



Ola Pukpuk, wanem kain ya. John Arthur bilong Yuni i wok long disko long bal mekim Fred Joku bilong Guria i no inap kisim bal long em.



Tupela Guria i guria long bal na was gut long em. Nogut Yuni i kam stilim. Ol i pilai fainol long winim Hara Kap long Ista Mande. Yuni i win 2-nil. Foto - William Wiliando



PHANTOM COMICS

OL HOTELMAN STILIM GOL

NO:679

Ausie Ruls Stat

Nesenal Kapital Ruls Futbal i statim namba wan raun pilai bilong em long Sarere, wik i go pinis. Long Sarere, Mosbi tim i daunim Rigo-ANG long Amini Pak.

Mosbi tim i soim ol arapela tim olsem, ol i mas lukaut gut long em long 1980 sisen. Ol i bagarapim tru Rigo ANG tim. Mosbi tim i gat 64 moa poms long Rigo ANG tim. Ol pilaia bilong Mosbi tim i kalap antap moa na holim gut bal. Na tu kik bilong ol i save go stret long man o long mak. Olsem na ol i daunim Rigo ANG tim isi tru.

Namba wan kota, Vavine Pala i kalap paitim gut bal na ol lain bilong em i kisim na kik. Long pinis bilong namba wan kota Mosbi i go pas long 21 poms na Rigo ANG i gat 7 poms.

Namba tu kota, ol pilaia bilong Mosbi i givim hat taim tru long ol man i lukautim mak bilong Rigo ANG. Wampela pilaia bilong Mosbi, Auel i painim birua na Peter Harold i senisim em. Klostu long pinis bilong kota, Tau Mea bilong Mosbi tim i pilai gut tru. Em i givim tupela gol long Mosbi tim. Na tu, wampela we em i holim bal tu, i stail nogut tru. Long pinis bilong kota, Mosbi tim i go pas long 47 poms na Rigo ANG i stap yet long 7

poms. Long namba tri kota Mosbi i go pas olgeta long poms. Na las kota nau, ol pilaia bilong tupela tim wantaim ol i stat long luk slek. Ol i pilai i go na Mosbi i win. Ol i gat 91 poms na Rigo ANG i gat 27 poms.

Na long bikipela pilai long Sande, tarangu Yuni tim i lus long ol sempion bilong Ausi Ruls, Wes tim. Tasol Wes i no bagarapim tru ol studen. Wes tim i winim ol long 4-pela poms tasol.

Long dispela pilai, ol pilaia i kalap na soim kain kain stail bilong holim bal. Tupela tim wantaim i soim olkain stail. Tasol Julius Longaio bilong Yuni tim i stail moa.

Clement Nakmai na Goodnews Aruai i pilai gut tru long Yuni. Nathan Kaumu i strongim tru tim bilong Wes. Long pinis bilong pilai Wes i gat 83 poms na Yuni i gat 79 poms.

Long ol arapela pilai, Koboni i winim Boroko. Na Difens i daunim gut tru nupela tim bilong dispela sisen, Kantri Igels.

● Lindsey Davison

Tupela Mosbi pilaia i ranim wampela Rigo ANG i go i kam. Em pret na salim bal i go aut hariap tru. Mosbi i givim stret Rigo ANG 91-27 taim ol i pilai long Amini Pak long Mosbi.

Namba 7 bilong Mosbi tim i paitim bal tasol i go long han bilong birua bilong em Rigo ANG. Mosbi i autim tiket bilong Rigo ANG, 91-27. Lukaut Mosbi i kamap nau. Nogut ol i kamap sempion long 1980.



AIR NIUGINI

THE NATIONAL AIRLINE OF PAPUA NEW GUINEA

HELPIM KANTRI GOHET



001455

Wantok

Digitized version made available by



Copyright: Under copyright

Rights Holder: Word Publishing Company Limited

Use: This digital version is made available from the UC San Diego Library under a license granted by the Word Publishing Company Limited. This digital copy of the work is intended to support research, teaching, and private study.

Constraints: This work may be protected by copyright law. Use of this work beyond that allowed by the applicable copyright statute requires the written permission of the copyright holder(s). Responsibility for obtaining permissions for any use and distribution of this work rests exclusively with the user and not the UC San Diego Library. Inquiries can be made to the UC San Diego Library program having custody of the work.

Note on digitized version: Some of the digital versions presented here reflects the quality and contents of the microfiche. Problems which have been identified include misfiled or out-of-order pages, illegible text; these problems have been rectified whenever possible.